



Broj: 01/1-02-524/15  
Ilijaš, 12.03.2015. godine

**Z A P I S N I K**

sa 28.(dvadesetosme) sjednice Općinskog vijeća Ilijaš, održane dana 12.03.2015.godine, sa početkom u 10h.

Dvadesetomom sjednicom OV-a Ilijaš predsjedavao je predsjedavajući Općinskog vijeća Ilijaš g-din Damir Filipović.

Prisutni vijećnici:

<b>RB.</b>	<b>IME I PREZIME</b>
<b>SDA</b>	
1	MAHIR DEVIĆ
2	NEDIM MATORUGA
3	SAUDIN DURMIĆ
4	HALID DIZDAREVIĆ
5	MUAMERA MASNOPITA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
<b>SDP</b>	
10	ALAN ŠERAK
11	MARIONETA ILIĆ-JURETA
12	DAMIR FILIPOVIĆ
13	SELVER HERIĆ
<b>SBB</b>	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
<b>SAMOSTALNI VIJEĆNICI</b>	
18	EDHEM HASANOVIĆ
19	ASIM MUJIĆ
20	NIHAD BUČUK
21	ENES DIZDAREVIĆ
<b>STRANKA ZA SREDNJE</b>	
22	BESIM GLJIVA
23	AIDA MALIŠEVIĆ

	<b>LDS</b>
24	NIJAZ RASTODER
	<b>BPS</b>
25	MUHAMED HANDŽIĆ

Prisutni gosti:

1. Aida Muratović - Radio Ilijaš
2. Mirsad Hamzić – predsjednik Savjeta MZ Malešići
3. Almir Špiodić – predsjednik Savjeta MZ Podlugovi
4. Alen Matoruga – predsjednik Savjeta MZ Misoča
5. Mehmed Smajlović – predsjednik Savjeta MZ Mrakovo
6. RTV Vogošća
7. RTV KS
8. Husein Hafizović – šef Službe socijalne zaštite Općine Ilijaš
9. Jusuf Zornić – načelnik V Policijske uprave
10. Aziz Pašić – zamjenik komandira PS Ilijaš

Ostali prisutni:

1. Akif Fazlić – općinski načelnik
2. Alma Imamović – pomoćnik načelnika
3. Zdravko Barić – pomoćnik načelnika
4. Nijaz Spahić – pomoćnik načelnika
5. Merima Osmanović – pomoćnik načelnika
6. Sanja Zagorac-Jozić – pomoćnik načelnika
7. Meliha Avdibegović – pomoćnik načelnika
8. Hamida Muratović – šef odsjeka u Službi za imovinsko-pravne poslove, geodetske poslove i katastar
9. Ilda Kahriman – sekretar OV-a
10. Adha Masnopita – stručni saradnik u Službi za društvene djelatnosti
11. Maida Habibović – zapisničar.

Predsjedavajući je otvorio sjednicu i konstatovao da postoji kvorum za odlučivanje.

Zatim je dao na razmatranje zapisnik sa 27. sjednice OV-a Ilijaš.

Primjedbi na zapisnik nije bilo, pa je OV-e jednoglasno usvojilo zapisnik sa 27. sjednice OV-a Ilijaš.

Potom je pročitao predloženi dnevni red i dao na razmatranje.

ADEM EFENDIĆ – vijećnik SBB-a

Predlažem da predlagač povuče tačku 5. Prijedlog Odluke o finansiranju parlamentarnih grupa u Općinskom vijeću Ilijašu, jer u samom nazivu pravi grešku, jer niti jedan naš propis ne poznaje pojam “parlamentarna grupa”, nego se zna da su tu političke stranke, klubovi vijećnika, koalicije i samostalni vijećnici.

Zatim je uslijedila pauza od 5 (pet) minuta.

Nakon pauze, predsjedavajući je konstatovao da je predlagač prihvatio prijedlog da se 5.

tačka skine sa dnevnog reda s obzirom da treba da uskladimo i trenutno novu regulativu sa Poslovnikom o radu Općinskog vijeća Ilijaš.

MUHAMED HANDŽIĆ – vijećnik BPS-Sefer Haliović

Evo načelnik je povukao ovu tačku dnevnog reda, a ja sada postavljam pitanje. Obzirom da je ova tačka prošla Komsiju za administrativne poslove, budžet, privredu, finansije i ekonomska pitanja i oni su dali pozitivno mišljenje, a ja pitam kakve to akte mi dobijamo na Vijeću i zašto to mi dižemo ruku. Jesu li to akti koji nisu u skladu sa zakonom, a evo izgleda da nisu. Ubuduće ću za svaku odluku i svaku inicijativu tražiti mišljenje Pravobranilašta.

NEDIM MATORUGA – vijećnik SDA

Ne bih se složio sa kolegom Handžićem da mi ovdje dobijamo akte koji nisu u skladu sa Zakonom, ja ipak cijenim kompetenciju ljude iz gore pomenute Komisije. Definitivno, po meni, nije bilo potrebe da se 5. tačka povuče sa dnevnog reda, jer član 7. Zakona o finansiranju političkih stranaka definiše parlamentarne grupe, a mi zapravo definišemo taj dio danas. Mi ne donosimo Odluku o finansiranju političkih stranaka na nivou Općine Ilijaš, nego mi donosimo Odluku finansiranju parlamentarnih grupa, odnosno klubova vijećnika. Dakle, to je definisano u članu 7. i to jasno stoji. Ne rješavamo mi ovdje državno pitanje finansiranja političkih stranaka. Dakle, ova Odluka po meni, nije trebala biti povučena sa dnevnog reda, ali evo do slijedeće sjednice Općinskog vijeća mi možemo još prodiskutovati, jer na kraju u članu 7. stavu (1) kaže se "i parlamentarnih grupa, odnosno klubova poslanika i delegana u parlamentarnoj skupštini, odnosno svim nižim nivoima". Ovo je državni Zakon koji se spušta na sve ostale nivoe. Ovo nam je osnova za donošenje ove današnje Odluke. Mi nemamo ovaj Zakon ni na federanom ni na kantonalnom nivou i zato koristimo ovaj državni Zakon i to je jasno i trebalo bi da bude jasno svima.

ADEM EFENDIĆ – vijećnik SBB-a (krivi navod)

Kolega Nedim je iznio par stvari koje nisu tačne, a tiču se Zakona o finansiranju gdje stoji i kaže Zakon o finansiranju političkih stranaka. Podsjetit ću vas da pogledata član 27. Poslovnika o radu Općinskog vijeća Ilijaš i vidite šta tretira, a takođe pogledajete i Izborni zakon član 3. i član 7.

Suština se mora promijeniti u ovoj Odluci.

NEDIM MATORUGA – vijećnik SDA (replika)

Kolega Ademe, član 27. Poslovnika o radu OV-a na koji se pozivate uopšte ne govori o finansiranju političkih stranaka, nego govori o nečem drugom. Dakle, citirate nešto što nema veze sa vezom. Očigledno ne možete da shvatite da nemamo drugi zakon, osim ovog državnog koji se spušta na niže nivoe.

Tačka je povučena sa dnevnog reda i nema potrebe da gubimo vrijeme na ovo.

SELVER HERIĆ – vijećnik SDP-a

Zamolio bih da nas ne zamajavate i ne pametujete previše, jer je tačka povučena sa dnevnog reda i argumente ostavite kada ponovo bude na dnevnom redu. Ne bih se složio sa prethodnicima da su u nadležnoj Komisiji svi kompetentni.

Diskutatana po pitanju dnevnog reda više nije bilo, pa je predsjedavajući konstatovao da je 5. točka povučena sa dnevnog reda i dao na glasanje predloženi dnevni red.

Općinsko vijeće je jednoglasno usvojilo slijedeći

#### **DNEVNI RED**

1. Vijećnička pitanja i inicijative
2. Izvještaj o realizaciji zaključka sa 27. sjednice
3. Izvještaj o radu općinskog načelnika i službi Općine Ilijaš za 2014. godinu
4. Operativni plan općinskog načelnika i službi Općine Ilijaš za 2015. godinu
5. Prijedlog Odluke o korištenju sredstava za otklanjanje posljedica prirodne nesreće i obnovu područja Općine Ilijaš zahvaćenih prirodnom nesrećom
6. Prijedlog Odluke o utvrđivanju novog građevinskog zemljišta i plana parcelacije za izgradnju apartmanskog naselja Ivančići
7. Prijedlog Odluke o izmjeni Odluke o utvrđivanju novog građevinskog zemljišta i plana parcelacije za izgradnju apartmanskog naselja Ljubnići
8. Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br.75/27 – po novom premjeru k.č.br.396/32)
9. Prijedlog Odluke o načinu i uslovima prodaje neizgrađenog građevinskog zemljišta (k.č.br.379/2)
10. Nacrt Odluka:
  - a) o usvajanju Regulacionog plana "Ljubnići-Ilijaš"
  - b) o provođenju Regulacionog plana "Ljubnići-Ilijaš"
11. Prijedlog rješenja o:
  - a) razrješenju člana Komisije za statut i propise
  - b) izboru člana Komisije za statut i propise
12. Prijedlog rješenja iz imovinsko-pravne oblasti:
  - a) rješenje broj:06/1-31-155/15
  - b) rješenje broj:06/1-31-161/15
  - c) rješenje broj:06/1-31-162/15
  - d) rješenje broj:06/1-31-314/15
  - e) rješenje broj:06/1-31-386/15
13. Informacija o stanju kriminaliteta, javnog reda i mira i saobraćaja na području Općine Ilijaš za 2014. godinu
14. Informacija o radu Službe socijalne zaštite Općine Ilijaš za 2014. godinu

#### **AD-1**

#### **Vijećnička pitanja i inicijative**

**AIDA MALIŠEVIĆ – vijećnica Stranke za Srednje**

Inicijative:

1. Pokrećem inicijativu da nadležna općinska služba iznađe mogućnost da građani Srednjeg i okolnih sela mogu ovjeravati zdravstvene knjižice u Srednjem. Predlažem da jednom sedmično dolazi ovlaštena osoba i vrši ovjeru zdravstvenih knjižica. Mislim da je ovo jedan od gorućih problema građana tzv. "gornjeg kraja" i nadam se da će nadležna služba ovo ozbiljno shvatiti i u što kraćem roku udovoljiti građanima "gornjeg kraja" općine.

2. Pokrećem inicijativu da se u Srednjem otvori punkt gdje bi policijska patrola bila prisutna 24h. Meni kao građaninu "gornjeg kraja" poznato je da se u zadnje vrijeme često dešavaju kriminalne radnje, a da bi policija intervenisala treba proći puno vremena da stignu na teren i samim tim ne mogu pravovremeno djelovati.

NIJAZ RASTODER – vijećnik LDS-a

Pitanja:

1. Zašto se nije pristupilo uređenju groblja Ljubnići onako kako je i planirano od strane Općine Ilijaš? Naime, prema planu je trebalo izvršiti parcelaciju spomenutog groblja.
2. Šta je sa zahtjevom Savjeta MZ-e Mrakovo, a koji su podnijeli 2014. godine u mjesecu septembru za rekonstrukciju puta sa glavnog puta Salkanov Han prema kući Adema Šeraka, a spor je nastao na dijelu puta pored kuće Kurte Mustafe?

Inicijative:

1. Pokrećem inicijativu da se pijaca pere poslije pijačnog dana tj. subotom poslijepodne, a može ostati i petkom kao i do sada.
2. Pokrećem inicijativu da komunalni inspektor izađe na teren, a posebno naselje Banovac, ul.Ivana Franje Jukića, centar Ilijaša i dr. i upozori stranke koje nisu uklonile plakate da to urade u što kraćem roku.

MARIONETA ILIĆ-JURETA – vijećnica SDP-a

Inicijative:

1. Upućujem inicijativu prema JU "Zavod za zdravstvenu zaštitu žena i materinstva" Kantona Sarajevo i "Zavodu za zdravstveno osiguranje" Kantona Sarajevo da se za lokalitet Ilijaš "Zavod za zdravstvenu zaštitu žena i materinstva" nabavi novi ultrazvučni aparat.

Obrazloženje: Lokalitet Ilijaš raspolaže sa ultrazvučnim aparatom proizvedenim 2003. godine, koji je ograničenih tehničkih mogućnosti kao npr. loša rezolucija, nemogućnost uvećanja, nemogućnost praćenja protoka fetalne i materne krvi, te patoloških tumora, nedostatak vaginalne sonde i softvera koji će podatke izbaciti u standardni sistem i potvrditi fetalni razvoj, te izdiferencirati benigne i maligne promjene, također otežano otkrivanje rane trudnoće što ograničava dijagnostiku i rano poduzimanje mjera o liječenju i tretmanu pacijentica koje su često prisiljene da putuju i potvrde dijagnozu u daljnjim zdravstvenim ustanovama u Sarajevu. Budući da Općina Ilijaš pokriva područje od 324 km<sup>2</sup>, sa 20.500 stanovnika, sa velikim brojem brakova i žena u reproduktivnoj dobi, u 2013. godini zabilježena je najveća stopa nataliteta na području Kantona Sarajevo, sa prosjekom 200 novorođenih beba godišnje, nabavka jednog savremenog ultrazvučnog aparata je neophodna, jer primjena ultrazvuka zauzima značajno mjesto u dijagnostičkoj i interventnoj proceduri u svim oblastima medicinske struke. Prema informacijama iz nadležne općinske Službe za društvene djelatnosti, Općina Ilijaš je spremna nabavku ultrazvučnog aparata sufinansirati sa 15.000,00 KM.

2. Pokrećem inicijativu da se stvore uslovi za rad savjeta mjesnih zajednica onako kako dolikuje, tj. obezbjede kancelarije u svim mjesnim zajednicama i u istom prostoru adekvatan namještaj (kompjuter, sto, komoda, itd.), a za sve one koji

posjeduju kancelariju da koordinator za rad sa mjesnim zajednicama izvrši nadzor rada mjesnih zajednica i vrijeme u koj su dostupni građanima, a koji treba da budu istaknuti na ulaznim vratima kancelarije ili oglasnim tablama, jer građani ne znaju u koje vrijeme i kada mogu tražiti potrebne informacije, potvrde itd.

3. Pokrećem inicijativu da se materijali za sjednice Općinskog vijeća Ilijaš dostavljaju predsjednicima savjeta mjesnih zajednica, jer nemaju mogućnost praćenja Vijeća i operativni plan načelnika i projekata.
4. Shodno problemu, a imamo na dnevnom redu dvije tačke (operativni plana načelnika i informaciju V Policijske uprave Ilijaš), pokrećem inicijativu da se postave nadzorne kamere u osnovnim i srednjim školama na području Općine Ilijaš, a za vid svih dešavanja u školama i oko škola (droga, nasilje, kriminal itd.) i zamolila bih načelnika da hitno bude u operativnom planu.
5. Građani Malešića traže od V Policijske uprave prisutnost policijskih djelatnika na tom području.

Obrazloženje: Sigurno vam je poznato da se na području Općine Ilijaš, učestalo dešavaju pljačke i provale u tuđu imovinu. Prisustvo policijskih djelatnika je svedeno na minimum. Prisutni su samo na poziv građana, što kriminalnim grupama daje veći prostor i mogućnost za pljačke, a naselje Malešići su specifični kao sam teren, te imaju ulaz i izlaz u susjedne općine Vogošću i Novi Grad. Građani su se obraćali Savjetu mjesne zajednice Malešići da im pomognu u rješavanju ovog problema, gdje su dobili odgovor da je savjet mjesne zajednice slao dopise na adrese V Policijske uprave, gdje i do danas nisu dobili pismeni odgovor.

BESIM GLJIVA – vijećnik Stranke za Srednje

Inicijativa:

1. Na području Općine Ilijaš u naselju Gornji Čevljanovići već oko 19 (devetnaest) godina živi porodica Žigić sa dvoje malodobne djece koji nemaju još uvijek priključenu električnu energiju na svom stambenom objektu. Napominjem da je to porodica koja se nalazi u teškom socijalnom statusu. Obzirom da je na snazi Odluka o priključku električne energije pod posebnim uslovima za objekte koji ne posjeduju građevinsku dozvolu, neophodno bi bilo da općina iznađe sredstva kojim bi platila priključak električne energije, a Mjesna zajednica Gajevi će preuzeti ostale obaveze tehničke prirode.

Želim samo još nešto reći vezano za ovaj bilten koji je radila JU KSC i Radio Ilijaš i za pohvaliti je da imamo ovako jedan printani materijal, ali sam primjetio da se nigdje u biltenu ne pominje naša tradicionalna Čevljanska korida.

Ova korida okuplja 60-70, a nekada i do 100.000 ljudi i ona je nešto po čemu je Ilijaš prepoznatljiv široj javnosti, pa čak i u svijetu. Funkcioniše po svim zakonskim principima. Sugerisao bih da se u nekim narednim periodima ustupi prostor u ovom biltenu vezano za Čevljansku koridu.

MAHIR DEVIĆ – zamjenik predsjedavajućeg (poslovnička intervencija)

Zamolio bih predsjedavajućeg da se držimo Poslovnika o radu Općinskog vijeća. Tačka

dnevnog reda je vijećnička pitanja i inicijative.

Mislim da nije mjesto i vrijeme da otvaramo pitanje mjesta i uloge Općine Ilijaš u organizaciji ove manifestacije.

BESIM GLJIVA – vijećnik Stranke za Srednje

Ne znam šta vidite loše u mojoj konstataciji da u jednom printanom listu se nađe i Čevljanska korida. Sve druge stvari koje je kolega iznio su tu da se u narednom periodu rješavaju.

MAHIR DEVIĆ – zamjenik predsjedavajućeg (replika)

Da je kolega kazao u svojoj inicijativu što je sada kazao u ovoj rečenici, ja ne bih intervenisao. Moram reći da je postojao javni poziv raspisan od strane JU KSC i Radio Ilijaš i svi koji su željeli da se prijave u ovaj bilten imali su priliku da se prijave. Ja nisam spreman da slušam izjave tipa da je Ilijaš poznat samo po Čevljanskoj koridi.

SELVER HERIĆ – vijećnik SDP-a

U potpunosti podržavam diskusiju Besima Gljiva i mislim da je išla u smislu inicijative za KSC i Radio Ilijaš da u budućnosti povedu računa o tome.

Inicijativa:

1. Pokrećem inicijativu da se uredi oblast za dodjelu općinski priznanja i da ta priznanja nose jedan brend za koji će se takmičiti građani i kada ih nagradimo da imaju zbog čega biti nagrađeni, a ne na ovakav način kako je to sada bilo.

Ne mogu da pređem preko toga da se tak onako dodjelju općinska priznanja. Ne ide mi u prilog da se uvijek borimo za smanjenje udruženje, finansiranje udruženja, a za Dan općine nagrade dobivaju predstavnici udruženja. Dosta je što im izdvajamo novac i dajemo plate, naravno čast izuzecima.

Argumenti koji su se navodili ne idu mi u prilog (član džemata) - pa svi smo članovi nekog džemata, parohija itd., (dao učešće u izgradnji džamije) – pa svi dajemo učešće u izgradnji džamija, crkvi, itd., to nisu obrazloženja, a ono što mi baš "para" uši (uredno obavlja radne zadatke na poslu gdje je zaposlen) – pa zar mu nije satisfakcija što je zaposlen i što uredno prima platu. Primjetio sam, meni je to paralo oči i stid me je bilo što neki pojedinci primaju nagradu, pa su i sami začudženi bilo što primaju nagradu. Znam da je načelnik htio da se ne zamjeni nikome, pa je prihvatio sve prijedloge, ali mi kao Vijeće ne smijemo ovo dozvoliti u budućnosti da neko mimo Vijeća dodjeljuje ova priznanja.

Još jednom pozivam da ovu oblast uredimo.

DAMIR FILIPOVIĆ – predsjedavajući

Obzirom da je 5. tačka povučena sa dnevnog reda, a vezano za nju, Kolegij OV-a je predložio Zaključak kojim se zadužuje Komisija za statut i propise Općinskog vijeća Ilijaš da do redovne sjednice koja će se održati u aprilu, pripremi izmjene i dopune Poslovnika o radu Općinskog vijeća Ilijaš ("Službene novine Kantona Sarajevo", broj:2/10), te iste uskladi sa važećim zakonskim propisima, te ga dao na glasanje.

Nakon glasanja, Mahir Dević je izrazio sumnju u glasanje, te je zatraženo pojedinačno glasanje.

ZA su glasali slijedeći vijećnici: Marioneta Ilić-Jureta, Damir Filipović, Nijaz Mašić, Edhem Hasanović, Besim Gljiva i Aida Mališević

UZDRŽANI su bili slijedeći vijećnici: Mahir Dević, Nedim Matoruga, Saudin Durmić, Halid Dizdarević, Muamera Masnopita, Muamer Dervišević, Fahir Hasanović, Rasim Šehić, Selma Pušina, Alan Šerak, Selver Herić, Adem Efendić, Sead Šehić, Akif Bešlija, Asim Mujić, Nijaz Rastoder, Nihad Bučuk, Muhamed Handžić i Enes Dizdarević.

Konstatovano je da zaključak sa 6 glasova ZA i 19 UZDRŽANIH nije dobio potrebnu većinu.

#### AD-2

Izveštaj o realizaciji zaključka sa 27. sjednice

Diskutanata po ovoj tački dnevnog reda nije bilo, pa je OV-e sa 23 glasa ZA i 2 UZDRŽANA usvojilo

Izveštaj o realizaciji zaključka sa 27. sjednice

#### AD-3

Izveštaj o radu općinskog načelnika i službi Općine Ilijaš za 2014. godinu

AKIF FAZLIĆ – općinski načelnik

Izveštaj je jako obiman, opširan i transparentan iz kog se moglo vidjeti šta su osnovni pravci djelovanja bili, kako su realizirani i kakva je problematika. Želim podsjetiti na ambijent koji je vladao prošle godine i koji je bio složen i jako težak. Trebamo se prisjetiti da je politička kriza, nestabilne vlade, budžeti sa deficitima itekako otežavali rad lokalnih organa i realizaciju zadataka, ne samo iz našeg budžeta, nego i budžeta viših nivoa vlasti. Mi smo u prošlu godinu ušli sa budžetskim deficitom koji je bio značajan.

Kada govorimo o rezultatima, njih je bilo jako dosta i možete vidjeti da smo po svim oblastima i po prioritetima realizirali naš operativni program rada. U kumulativu taj operativni plan je realiziran iznad plana, a mali broj stavki nije realiziran kao što je RTG aparat, dječije igralište, asfaltiranje puta za Katane.

Osvrnuo se na par značajnijih projekata u oblasti obrazovanja, zdravstva, saobraćajne infrastrukture i komunalne infrastrukture. Urađeno je i niz malih projekata (izdata knjiga monografija šehida, uređenje spomen-obilježja, sportska ploha u Starom Ilijašu) i još projekata koje sada ne bih nabrajao.

MUHAMED HANDŽIĆ – vijećnik BPS-Sefer Halilović

Iz izveštaja se jasno vidi da je operativni plan ili budžet za proteklu godinu realizovan, ja bih rekao u 100% obimu i na tome mu zahvaljujem. Zahvaljujem se inspektoru koji nam je dostavio šta su njegove nadležnosti i nisam znao da on ima ovoliko nadležnosti.

Jedna moja inicijativa se odnosila na ograđivanje mezarja u Starom Ilijašu, pa evo neka mu to bude ponovo jedno pitanje je li on i kada će podnijeti zahtjev prema nekome ko je nadležan za ograđivanje mezarja.

Ovom izveštaju se nema šta dodati i ovo izvršenje me zaista impresionira.

MAHIR DEVIĆ – zamjenik predsjedavajućeg

Ova inicijativu kolege Handžića, iako se možda ne tiče direktno ovog izvještaja, u operativnom planu je planirano, a evo apelujemo da se sa tom aktivnošću krene što prije. Znači, pridružujem se podršci inicijative kolege Handžića.

ADEM EFENDIĆ – vijećnik SBB-a

Služba za opću upravu stalno ponavlja (2012., 2013. i 2014.godina) kako ima problema u radu savjeta mjesnih zajednica, pa bih zamolio da Služba i Komisija za rad sa mjesnim zajednicama vrše nadzor i nastoje da se zborovi češće održavaju, a kroz operativni plan sam vidio da će biti nešto od uređenja kancelarija savjeta mjesnih zajednica.

Pitanje pasa lualica (7000 KM u 2013., 7000 KM u 2014.), uloženo je puno za kastraciju, a pasa je sve više i više, pa da se povede računa o tome.

Poticaji za poljoprivredu proizvodnju – pad je kada se tiče sredstava u odnosu na 2013. godinu, a jedino što se vidi da smo povećali broj pčelinjih društava. Ako može odgovor koja su to 23 korisnika za poticaj mjera uzgoja pčelinjih društava. Za svaku je pohvalu projekat plasteničke proizvodnje.

Izrada projekata vezano za Službu za prostorno uređenje i stambeno-komunalnu oblast interesantno je da za Industrijusku zonu Luka plati glavni projekat 6318 KM, a da se sada za izmjene i dopune projekta plati 3740 KM. Mislim da se puno para potroši na ovo, pa ću sebi dati za pravo da predložim da Služba počne neke stvari raditi. Možemo primiti 2-3 inženjera koji su certificirani da rade te projekte.

Kada se tiče izvodžača radova, pogotovo puteva, za pohvalu je koliko je urađeno, ali načelnice ubuduće, obzirom da imate planirana sredstva kod sufinansiranja, date prioritet registrovanim ulicama, putevima, a ne privatnim putevima i sokacima ili izvršite eksproprijaciju i taj put uknjižite.

Jedna zabrinjavajuća stvar, po meni, kod odabira izvodžača, jer sam za domaće izvodžače. Naime, do 2014. godine pojavljivao se izvodžač "Citar-produkt", a sada ga ne vidim, pa da mi pojasnite je li to zbog kvaliteta radova ili je nešto drugo.

Službu za imovinsko-pravne poslove bih zamolio da sve ono što je do Općine Ilijaš da rješava pitanje zgrade preko puta pošte "Arhaz".

Pokrećem inicijativu, vezano za obilježavanja Dana nezavisnosti, vezano za dekoraciju, nisam vidio ni na jednom mjestu zastavu, da se o tome povede računa.

Održavanje grobalja – podhitno treba odrediti upravitelje grobalja.

Općina bi trebalo da ima javni wc, sat na javnom mjestu.

Služba za društvene djelatnosti – pohvala vezano za stipendije i mi smo svojim odlukama doprinijeli da se poveća broj korisnika stipendija. I vi ste mogli primjetiti da nema doktoranata, odnosno magistara ne moraju biti na birou. Ovdje je problem što mogu biti samo oni koji su na birou, a vidim da ste i vi za to.

Kada je u pitanju kultura – prepisano je 2011., 2012., 2013., a u 2014. godini me najviše interesuje i da mi neko odgovori kako je moguće da horska sekcija Preporoda isti dan bude u Podlugovima, Brezi i Njemačkoj. Imam jedan plakat gdje je na plakatu neki Muzaferija, pa da li mi njega finansiramo ili Preporod?

Provjerite gdje vam 2400 KM za ograđivanje stadiona Ljubnići.

Nadam se da ćete ove moje primjedbe uvažiti u ovoj tekućoj godini.

NIJAZ RASTODER – vijećnik LDS

Zašto je gospodine načelnice OŠ "Hašim Spahić" Ilijaš kažnjena po pitanju finansija? Da li to Vi imate neki problem tamo ili po nečijem nalogu to radite. Kada su u pitanju određene manifestacije naš direktor se uvijek pojavi sa 30-40 djece. Naravno, mi ćemo to uvijek raditi zbog ljudi koji su to zaslužili. Međutim, nije korektno da se na ovakav način kažnjava ova javna ustanova. Što se tiče kompletnog izvještaja Vi ste načelnice uradili ono što ste obećali, ali je problem kako ste to uradili. Ja ne smijem da se upuštam u ovaj izvještaj, jer ako se budem pojedinostima bavio, neće biti dobro.

AKIF FAZLIĆ – općinski načelnik

Zahvaljujem se vijećnicima koji su dali ovakvu ocjenu izvještaju i radu u prethodnoj godini. Također želim dati par komentara na izlaganje vijećnika Adem Efendića. Neke stvari koje je iznio nisu ni bile u planu za prošlu godinu, ali ima dosta dobrih prijedloga koji se mogu planirati u narednim operativnim planovima. Bilo je i par pitanja, kao ono zašto se ne pojavljuje "Citar-produkt", pa to je zato što se ta firma nije javljala na naše tendere u prethodne dvije godine. Kada je u pitanju sufinansiranja puteva, slažem se, s tim što hoću reći da smo sve zahtjeve koji su bili u prošloj godini realizirali. Pitanje projektovanja jeste zaista jedan od problema i vrlo često se susrećemo sa projektima i kada izađemo na teren koliko su realno utvrdili na terenu, pa često moramo neke stvari preprojektovati, zatim rješavanje imovinskih odnosa i onda izanalizimo nova rješenja, pa iz toga proizilaze novi projekti. Kada su u pitanju podsticaji ili bilo ko šta je dobio, može se izvršiti uvid.

Kada je u pitanju zgrada "Arhaz", nažalost, nije se moglo doći do rješenja koje bi zadovoljilo i jednu i drugu stranu, pa je to sada na sudu.

Pitanja ograđivanja mezarja, upravitelji, dekoracija grada, sahat kula, javni wc, može biti predmet planiranja u narednom periodu.

Finansiranje Preporoda – kada gledamo visinu sredstava, moramo pogledati i strukturu da je dosta projekata kroz Preporod prošla.

Pitanje zašto je OŠ "Hašim Spahić" Ilijaš kažnjena, mi podržavamo male projekte koje vodi škola i đaci, a kada su u pitanju kapitalni projekti svi znate da mi sufinansiramo svaki projekat za naše javne ustanove i tako je bilo i za Podlugove i Srednje, ali nažalost OŠ "Hašim Spahić" još nije prošla nigdje na aplikacijama da dobije projekat i da mi sufinansiramo. Ova godina će biti interesantna za ove projekte i na sastanku sa direktorima škola sam to naglasio i očekujem da će se intenzivno uključiti u proces apliciranja i dobivanja sredstava, a kroz budžet Općine Ilijaš će biti u punom kapacitetu sufinansirani.

DAMIR FILIPOVIĆ – predsjedavajući

Zaključio je raspravu po pitanju ove tačke dnevnog reda i dao pauzu od pet minuta.

Nakon pauze, predsjedavajući je dao na glasanje ovu tačku dnevnog reda.

OV-e je sa 18 glasova ZA, 3 PROTIV i 2 UZDRŽANA usvojilo

Izvještaj o radu općinskog načelnika i službi Općine Ilijaš za 2014. godinu

AKIF FAZLIĆ – općinski načelnik

Pokušali smo dati ambiciozan plan sa visoko postavljenim ciljevima. Operativno smo postavili aktivnosti, nosioce i rokove. Može se vidjeti suština onoga što ćemo raditi u 2015. godini, mogu se vidjeti prioritete koje predlažemo i dinamika realizacije i praktično svaka ozbiljnija aktivnost koja će se dešavati u 2015. godini. I dalje, osnovne konture u 2015. godini i prioritete jesu infrastruktura (komunalna, saobraćajna, energetska, telekomunikacijska), poslovni ambijent (privreda i zapošljavanje), sanacija šteta nastalih iz nepogoda u prošloj godini (klizišta, deminiranje, uređenje vodotoka), društvene djelatnosti (obrazovanje, zdravstvo, kultura, sport, mladi), socijalna politika i uprava.

Kada je u pitanju komunalna infrastruktura predviđena je izgradnja preko 3 km kanalizacione mreže (osnovni projekat je Industrijska zona Luka i naselje Luka), a kanalizacija će se parcijalno raditi u naseljima Kamenica, Malešići, Kadarići, Donja Karaula i Ljubnići.

Kada su u pitanju vodostistemi (Industrijska zona Luka i vodoopskrbni sistem Junakovac). Javna rasvjeta je postavljena mnogo ambicioznije planski nego što je to bilo realizovano prošle godine (preko 140 rasvjetnih tijela je planirano da se uradi u 2015. godini).

Značajna poboljšanja očekujemo i planiramo u upravljanju čvrstim otpadom i sve što je vezano za projekte iz te oblasti i jedan broj ekoloških projekata i čisto komunalnih (ograđivanje mezarja Ljubnići, Stari Ilijaš i niz malih projekata za koji se pokazao interes ne samo vijećnika nego i građana).

Kada je u pitanju saobraćajna infrastruktura vidjeli ste plan koji je dostavila Direkcija za ceste Kantona Sarajevo gdje je tretiran regionalni put na dionici od naplatnih kućica u Podlugovima prema raskršću za Podlugove i Visoko gdje je tretiran novoutvrđeni regionalni put II kategorije Stari Ilijaš-Bioča-Ahatovići i gdje smo mi kroz svoja sredstva predvidjeli da ćemo asfaltirati 8 km novih puteva, projekat izgradnje mosta na rijeci Rači koji je započet, put unutar Industrijske zone i završetak puta koji treba da omogući komunikaciju prema Starom Gradu Dubrovniku.

Kada je u pitanju elektroenergetska infrastruktura i telekomunikacije vidjeli ste iz plana elektrodistribucije i elektroprenosa ono što je za nas puno važnije iz plana elektroprenosa se vidi da su započete pripremne aktivnosti na izgradnji nove trafostanice u Željezari Ilijaš. Predviđena je rekonstrukcija elektro mreže na području Balbegovića, Ivančići i Gornji Malešići, uvodi se novi projekat koji podrazumjeva daljinsko očitavanje strujomjera, zatim rekonstrukcija dalekovoda Blažuj-Luka.

Također, telekom vodi intenzivne aktivnosti kada su u pitanju pristupne mreže (MZ Mrakovo, Ljubnići i Lješevo).

Privreda i zapošljavanje – naš domen i uticaj nisu veliki.

Poslovni ambijent – oslonac nam je Industrijska zona Luka, izgradnja bolje infrastrukture za privrednike, zatim i dalje subvencioniranje poljoprivredne proizvodnje, plasteničke proizvodnje, podrška aktivnoj politici zapošljavanja, poticaj za mala i srednja brzorastuća preduzeća. Generalno, ono što očekujemo od privrede u 2015. godini vezani su za Željezaru Ilijaš i dolazak strateškog partnera – Grupacija Prevent.

Očekujemo trend rasta u sferi drvne industrije.

Saniranje šteta-klizišta (ozbiljno smo potcrtali ove aktivnosti u ovom planu)

Društvene djelatnosti – najznačajniji projekat je nadziđivanje zgrade Doma zdravlja i zgrade Općine Ilijaš gdje ćemo riješiti pitanje prostora za nove zdravstvene funkcije

(centar za fizikalnu terapiju, centar za mentalno zdravlje i neke druge centre koje će DZ otvoriti i da riješimo problem općinske sale i potreba organa uprave).

Kroz projekte energetske efikasnosti za sve javne ustanove, a ovdje govorimo i o OŠ "Hašim Spahić" općina je kroz budžet i kroz operativni plan će sufinansirati te projekte.

Ono što nije realizirano jeste nabavka RTG aparata, dječije igralište, početak rješavanja stvari u Podlugovima vezano za dom i sportsku pluhu.

Također, bilo je govora o stadionu u Ljubničima gdje se mora dokupiti dio zemlje i taj proces smo pokrenuli vidjet ćemo sa vlasnicima kako ćemo to riješiti.

Cijenimo da je i prioritet da uradimo dva važna projekta: projekat rekonstrukcije gradskog stadiona u Ilijašu i sportskog centra u Mrakovu.

Ono što smo pokrenuli i što dobiva na značaju jeste uređenje nekropole stećaka Kopošići.

Kada je u pitanju socijalna politika podršku očekujemo i ona se realizuje kroz Centar za socijalni rad, ali mi moramo dodatno podržavati kroz rad udruženja (penzionera, crvenog križa, merhamet, Udruženje "Budi mi drug" i drugih udruženja), kroz jednokratne novčane pomoći, sendviče za učenike u stanju socijalne potrebe itd.

Na poboljšanju rada organa uprave znate da imamo uvedene standarde po ISO standardu i ove godine očekujemo izmjene i dopune tog standarda i ono što ćemo ove godine uvesti je jedan novi standard koji je propisan novim zakonima o budžetima, a radi se uvođenju stadarda finansijskog upravljanja i kontrole koji uvodi obavezu potpisivanja fiskalne odgovornosti, prije svega općinskog načelnika, a onda i svih onih koji troše i opravdavaju finansijska sredstva.

Opšta uprava-mjesne zajednice – obaveza nam je opremanje matičnog ureda i shodno tim standardima očekujemo kroz dobivanje novih prostora da dobijemo pravi prostor za matični ured i mi smo po svojim prioritetima rekli da ćemo izvršiti opremanje i sanaciju mjesnih ureda u Lješevu, Stari Ilijaš, Ljubina i nabavka opreme za mjesni ured MZ Malešići. Ovo je bilo ukratko sa aspekta prioriteta aktivnosti i nabrojano je sve ono što je praktično pokriveno budžetom koji smo donijeli.

MAHIR DEVIĆ – zamjenik predsjedavajućeg

S obzirom da je ovaj dokument rađen prije nego što je došlo do izmjene zakona u Vladi Kantona Sarajevo i da se onaj dio stambene politike svrsta u dio ministarstva kojem pripada.

SEAD ŠEHIĆ – vijećnik SBB-a

Gospodine načelnice, pošto ste u operativnom planu uvrstili rješavanja oborinskih voda iznad fabrike "Standard" u Starom Ilijašu, zaim rekonstrukciju puta fabrika "Kalea"-most Malešići, ja imam prijedlog da se uvrsti rekonstrukcija komplet puta most Malešići-željeznička stanica prema Odluci o izuzetom zemljištu za fabriku i put iz 80-tih godina, te trenutnim regulacionim planom ovog naselja iz razloga jer su se stekli uslovi planom odvoda površinskih voda prema operativnom planu kako bi se riješio dugogodišnji problem. Također, građani ovog dijela su spremni učestvovati u pomenutom projektu, a ovaj put bi bio dobra zaobilaznica u slučaju bilo kakvih zapreka-saobraćajnih udesa, rekonstrukcije na regionalnom putu.

Stranica 6. - piše MZ Mrakovo-nadopuna postojeće rasvjete, a svugdje ste naveli gdje, pa me interesuje gdje je to tačno u Mrakovu.

Izradnja dječijeg igrališta u Ilijašu – da li je to sportska ploha ili neko igralište sa većim sadržajem za djecu.

Izrada projekta rekonstrukcije gradskog stadiona u Ilijašu – koliko nam je poznato oni su

dobili koncesiju i sada ih opet treba nešto pomagati i finansirati. Zašto smo im onda davali koncesiju?

Tražim objašnjenja za gore navedeno.

BESIM GLJIVA – vijećnik Stranke za Srednje

Operativni plan načelnika sa tehničkog aspekta je jako dobar. Usklađenost sa budžetom koji smo nedavno usvojili, je takođe dobra. Međutim, primjetio sam da je kroz operativni plan vrlo malo značajnih projekata predviđeno za gornji kraj općine. Projekti rasvjete, projekti uređenja mjesnih zajednica su sitni projekti od kojih vrlo malo ko ima koristi. Poznato mi je da načelnik ima na umu, ali evo ni budžetom nije uvrštena niti jedna faza vodozahvata Vrutak koji je vrlo značajan projekat za veći dio općine, a drugo što je mnogo bitnije jeste izlaganje zemljišta na gornjem kraju. Ono što koči razvoj općine Ilijaš na gornjem kraju, jeste neuređen grunt i katastar i nedovoljno snabdijevanje vodom. Svi investitori koji su posljednjih mjeseci dolazili i bili zainteresirani za ozbiljnije projekte su svi odustali iz ovih razloga koje sam naveo.

MUHAMED HANDŽIĆ – vijećnik BPS-Sefer Halilović

Što se tiče operativnog plana načelnika, jednostavno, on je samo obrazloženje budžeta i ako sam dao podršku budžetu, dat ću i ovome operativnom planu. Neću iznositi svoje zahtjeve ili eventualno primjedbe, samo ću iznijeti molbu koja se odnosi na sektor društvene djelatnosti i zamolit ću pomoćnicu načelnika za društvene djelatnosti da dođe u Bioču i vidi u kakvim uslovima radi osoblje i učenici u područnoj školi u Bioči. Nisam vidio da su planirana sredstva za opremanje prostorija ove škole. Ohrabrujuća je podrška direktora škola koji je rekao da će pokušati sve uraditi da ona bude donekle adaptirana. Ovi učenici nemaju niti sportsku plohu.

MAHIR DEVIĆ – zamjenik predsjedavajućeg (replika)

Pridružujem se dijelu diskusije koji se odnosi na poboljšanje odgoja u ovoj obrazovnoj školi i ona je jedna od tri područne škole OŠ Stari Ilijaš i ona je zaista u najlošijem stanju i u vrhu prioriteta je koje će preduzeti menadžment OŠ "Stari Ilijaš". Nekih stvari je u međuvremenu urađeno, prostorije su okrečene, nešto je urađeno i na instalacijama, ali ovdje je potrebno uraditi kompletan projekat rekonstrukcije. To će biti visoka budžetska stavka i pokušat ćemo tražiti izvor finansiranja na višim nivoma vlasti, a Općina Ilijaš će sigurno učestvovati u sufinansiranju.

ADEM EFENDIĆ – vijećnik SBB-a

Operativni plan načelnika za 2015. godinu zaslužuje svaku pohvalu, s tim da vodi računa da svi subjekti učestvuju u realizaciji ovog plana, da to ne bude jednopartijski. Zamolio bih, ako je moguće, da se u ovaj plan uvrsti izgradnja, ja bih rekao, modernih nadstrešnica na autobuskim stajalištima.

Takođe, predlažem da se postavi par rasvjetnih sijalica u naselju iza "Binga".

Ima stvari koje nisu realizovane iz plana 2014. godine, pa pitam zašto nisu i ako može da se sada uvrsti projektovanje ulice Polomska i nabavka zemljišta za sportsku plohu u Podlugovima. Šta se desilo pa nije nabavljena?

NIJAZ RASTODER – vijećnik LDS-a

Ovaj operativni plan je prilično prihvatljiv, jer se dosta veže za budžet, ali ima nekih nelogičnosti i opet spominjem OŠ "Hašim Spahić" koje nema nigdje u planu, a ineteresuje me načelnice ova mašina za čišćenje za OŠ "Stari Ilijaš" da li je predviđena za remont ili za kupovanje?

Dalje, jedno od gorućih pitanje koje je nekada postavljano i bivšem načelniku jeste, šta vi imate sa investitorima koji sami ulažu u ovu općinu? Što će vaš plan biti njihov plan? Ovo je jedno staro pitanje, pa evo i ja ga potenciram, jer sam shvatio da je dobro pitanje.

MAHIR DEVIĆ – zamjenik predsjedavajućeg (replika)

Radi informacije kolege, želim reći da mi u Starom Ilijašu imamo u desnom bloku zgrade jedan sprat, a u lijevom dva sprata, pa su nam potrebne, ne jedna mašina, nego tri mašine.

NIJAZ RASTODER – vijećnik LDS-a

Znam da ste sebi napravili komfor i to je dobro, ali ja sam postavio pitanje općinskom načelniku, a ne vama.

SELVER HERIĆ – vijećnik SDP-a

Ovako ambicioznom planu ja se divim, ali pošto vidim da su investitori pretežno Kanton Sarajevo i Direkcija za ceste Kantona Sarajevo, prosto ne vjerujem u ovaj plan, ali podržavam ga. Ako se odradi ovo što je planirano, ja bih zamolio ako može da se u ovaj operativni plan doda sanacija i obnova zgrade mjesnog ureda Srednje, a vidim da ste ga planirali obnoviti sa krovom. Dalje, pitam šta je sa realizacijom onog što smo prije 5-6 godina dogovorili da proširimo mjesni ured Srednje, da se uradi fasada, da se tu smjesti odjeljenje PU Ilijaš, tu su donesen neki namještaj PU i s tim se stalo i ništa se nije uradilo.

Kada su u pitanju putevi, dotaći ću se malo zimskog održavanja puteva. Zamolio bih da ne dođemo u situaciju kao svake godine da se ne zna ko zove, koga zove i šta se sve čisti. Za slijedeću godinu da dodate ili da pojedine dionice ukinete koji se s razlogom ne smiju nalaziti u tabelarnom prikazu za čišćenje, jer su to privatni putevi i građani s razlogom negoduju.

Neke dionice još nisu očišćene, a snijeg je pao prije mjesec dana.

Kada je u pitanju komunalna djelatnost-uređenje i obnova mezarja, zamolio bih da uvrstite katoličko groblje Kujbaba.

Sportsku plohu Donji Čevljanovići sam nekada davno pominjao i tražio da se ogradi i ne bi loše bilo da tu ogradu uvrstite ovaj operativni plan.

Kada je u pitanju uprava, zamolio bih da se razmotri mogućnost unapređenja i poboljšanja rada mjesnog ureda u Srednjem i da taj ured ne radi samo zbog izdavanja rodni listova, uvjerenja o državljanstvu i ovjeravanja fotokopija, nego da služi u svrsi žitelja tog područja kako ne bi morali dolaziti u općinu Ilijaš radi izdavanja posjedovnog lista, skice i sl., jer se to može uraditi u Srednjem, predati zahtjev i radnik Srednjeg dođe u općinu i to odradi.

MAHIR DEVIĆ – zamjenik predsjedavajućeg

Zaključio je raspravu po ovoj tački dnevnog reda i dao riječ općinskom načelniku.

Put "Kalea" - moram reći da smo svi dali ocjenu da je ovo ambiciozan plan i mogućnosti proširenja ovog plana na bazi budžeta nije moguće. Ovo jeste nešto što trebamo završiti i stavili smo da u prvoj fazi riješimo ovo i da stvorimo pretpostavke da dođemo do Starog Ilijaša. Ovdje nije samo finansijski problem, nego i imovinski, ali je bitno da uđemo u ovaj projekat i krenemo dalje.

Javna rasvjeta – dali smo naznake po mjesnim zajednicama i ono što jeste prioritet da postavimo rasvjetu gdje je nema.

Dječije igralište – imamo dvije lokacije, jedna je u blizine naše šetnice gdje postoje stari rekviziti, a druga između zgrada A1 i A2. Ja sam opredjeljenja da idemo na prvu lokaciju, ali to možemo izdefinisati.

Projektovanje stadiona – mi nismo dali koncesiju, nego upravljanje stadionom. Upravljanje javnim objektima je jako složeno.

Vodovod Vrutak – u ovom operativnom planu smo krenuli od početka. Projektna dokumentacija je urađena, ali pitanje imovinskih odnosa nije riješeno. U konačnici pokrećemo ovaj projekat, prije svega operativnim planom je definisano da se uradi elaborat vodozaštitnim zonama, odnosno vodozaštitnoj zoni Vrutka kao osnova da se može proglasiti javni interes.

Izlaganje zemljišta – svi znamo problematiku tog gornjeg područja. Ohrabrujuća vijest je da je Federalna geodetska uprava shvatila ovu problematiku i pokrenut će se postupak izlaganja i nama će biti odobreno da u ovoj godini idemo sa izlaganjem katastarskih općina Ljubina i Kamenica. Naravno, za sve katastarske općine na gornjem području će trebati 4-5 godina.

Nadstrešnice na autobuskim stanicama – ja sam napisao u 2016. godini zato što nemamo budžetsku pretpostavku za ovaj projekat i po mojoj procjeni je potrebno cca 60.000 KM i u ovoj godini ćemo izvršiti sve pripreme i napraviti ćemo jedan projekat da se nadstrešnice na autobuskim stajalištima urade.

Projektovanje Polomske ulice – nije precizno definisano u planu, ali će se neki broj projekata, koje nismo mogli naznačiti odmah, uraditi po potrebi.

Ne realizacija projekta zemljišta za sportsku pluhu u Podlugovima – svi znamo problematiku ovoga. Izrazili smo potrebu da se to realizira i prošle godine.

Vratili smo se onome što imamo i na jesen se vraćamo u taj posjed, ali ta lokacija daje realne pretpostavke da se može napraviti sportska ploha i da se ide dalje fazno u rekonstrukciju doma.

Pitanje šta imamo sa investitorima koji sami ulažu – ovdje su pomenuti investitori iz javnog sektora. Ako neko misli da oni sami dolaze što nas vole i što se ne vode razne aktivnosti, od političkih i drugih, to nije tako. Ja garantujem da je pritisak koje je napravilo ovo Vijeće, medijski pritisak koji smo napravili, uticao da se nađe u programu elektroprenosa trafostanica.

Mjesni ured Srednje – prošle godine matični ured je djelimično uređen. U operativni plan smo stavili uređenje krova. Za proširenje smo dali urbanističku saglasnost da Ministarstvo unutrašnjih poslova Kantona Sarajevo ide na ovo, ali se na tome stalo i vidjet ćemo šta dalje.

Pitanje ograda za mezarja/groblja – to godinama vodimo, s tim što su to vodile mjesne zajednice, mi smo obezbjeđivali materijal, a ljudi iz tih mjesta su to ograđivali. Ova dva mezarja u Ljubnicima i Starom Ilijašu su nešto drugo, oni nisu vezano za jedno naselje i zbog toga i jesu naznačena u ovom planu.

Obzirom da diskutanata po ovoj tački dnevnog reda više nije bilo, OV-e je jednoglasno usvojilo

Operativni plan općinskog načelnika i službi Općine Ilijaš za 2015. godinu

Uslijedila je pauza 45 minuta.

AD-5

Prijedlog Odluke o korištenju sredstava za otklanjanje posljedica prirodne nesreće i obnovu područja Općine Ilijaš zahvaćenih prirodnom nesrećom

AKIF FAZLIĆ – općinski načelnik

Poslije prošlogodišnjih prirodnih nepogoda Federalni parlament je donio dva zakona kojim je definisano da određena namjenska sredstva mogu dobiti i namjenu za sanaciju šteta koje su nastale od nepogoda. Ovdje se misli i na sredstva od skloništa, renti i niz drugih namjenskih sredstava. Zakon je predvidio da, ako općine ulaze u to, da i mi svoja namjenska sredstva možemo preusmjeriti u to.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o korištenju sredstava za otklanjanje posljedica prirodne nesreće i obnovu područja Općine Ilijaš zahvaćenih prirodnom nesrećom

AD-6

Prijedlog Odluke o utvrđivanju novog građevinskog zemljišta i plana parcelacije za izgradnju apartmanskog naselja Ivančići

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Kao što znate 2013. godine donijeli smo tri odluke o utvrđivanju novog građevinskog zemljišta. Danas imamo novu odluku, a u pripremi i najavi još 2-3 lokaliteta gdje su se javili potencijalni investitori za izgradnju ovih naselja. Lokalitet Popovića je u završnoj fazi, Ljubnići su u fazi izdavanja dokumentacije za infrastrukturu, za Bioču znam da su pripremljeni projekti na nivou urbanističkog projekta i nadam se u dogledno vrijeme da će to krenuti i u Bioči. Danas imamo lokalitet Ivančića, površina zemljišta 2,5 ha sa ukupno 48 građevinskih parcela sa površinom parcele 470 do 720 i manji su to objekti od 100 do 250 m<sup>2</sup>, maksimalne spratnosti suteran+prizemlje+potkrovlje obzirom na sam teren koji je u nagibu. Osim stambenih objekta na tom lokalitetu imamo rezervisanu jednu parcelu na kojoj će se izgraditi određeni društveni sadržaji.

DAMIR FILIPOVIĆ – predsjedavajući

Postavio je pitanje ko je investitor.

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Investitor je firma WASEL REAL ESTATE i oni su vlasnici zemljišta. U Popovićima je firma MM UNITED, a Ljubnići i Bioči je firma SENABIL.

MUHAMED HANDŽIĆ – vijećnik BPS-Sefer Halilović

Ova odluka i prethodne pokazuje da se na području Općine Ilijaš prodaje zemljište i najavljuje izgradnja novih objekta. Jednom smo ovdje imali raspravu oko davanja vode na korištenje drugih općinama. Ovim tempom kako ide naseljavanje, mislim da nam neće biti dovoljna Misoča i morat ćemo tražiti još jedan vodozahvat i mislim da će izvor Vrutak doći ne samo do Ilijaša, nego i do Visokog.

Kada se tiče ovih potencijalnih investitora jasno je da se radi o firmama "tašna i mašna", a Bioča je jedan od pokazatelja. Naime, mi damo saglasnost, pretvaranje poljoprivrednog zemljišta u građevinsko, a onda dođe ta firma "tašna" isječe drva, ostavi pustoš, te se pokreću klizišta i ništa drugo. Ništa nisu napravili osim idejnog projekta od 236 kuća, te bombastičnim sadržajima na onoj slici i ne mislim da ću ja i bilo ko od nas doživjeti da se to u Bioči uradi kako je to planirano. Mi smo svjedoci uništavanja tog prostora, kod nas konkretno 800 dunuma na području općine Ilijaša i isto toliko sa druge strane u općini Visoko. Moramo dobro razmisliti o ovim odlukama i menadžment općine se mora pozabaviti s ovim, kada će ti ljudi početi sa konkretnom izgradnjom tj. konkretnim ulaganjima. Želim još reći da oni ne zapošljavaju puno radnika sa Općine Ilijaš i pokazatelj su Popovići gdje je dnevnicu 22 KM i to je sramotno i to se zove eksploatacija radne snage.

AKIF FAZLIĆ – općinski načelnik

Ovo što je otvorio vijećnik Muhamed Handžić jeste bitna tema i moramo je razmotriti sa svih aspekata. Neke odluke smo već donijeli, a neke su u najavi, a želim da svi znamo o čemu se radi i šta očekujemo. Da bi to sve znali, moramo znati suštinu koja je ovo vrsta privredne aktivnosti. Ovo je klasična djelatnost nekretnina.

Ja cijenim da je ovo nešto što ne bi smjeli propustiti i gledam na ovo kao afirmaciju općine. Možda previše očekujemo od efekata. Za naš budžet to su dobri efekti, a u osnovi, ako se razvije turizam, trebaju pretpostavke, ali država ih još nije napravila i to ćemo još vidjeti.

Na ovo gledam kao pozitivnu stvar i raduje me što se ovo desilo na području Nišićke visoravni gdje nam je potrebno više objekata i više ljudi.

Imamo pozitivno iskustvo sa Popovićima i rok je 30. juni da se naselje završi i preda investitoru, ali nažalost za Bioču, od investitora sam dobio informaciju da su dobili zemljište vrlo teško za izgradnju, treba puno ulaganja, a čak se boje klizišta, a ovo što uzurpiraju prostor stvar je inspekcija.

Priča na čijoj se zemlji pravi, pa pravi se na zemljištu vlasnika, a znamo šta je privatno vlasništvo i sva prava koja proizilaze iz toga.

O ovome treba otvoreno pričati i podijeliti mišljenja i ići putem koji jeste interes ove općine.

MUHAMED HANDŽIĆ – vijećnik BPS-Sefer Halilović

Lijepo je to načelnik sve obrazložio, ali nije se dotakao gorućeg pitanja koje sam postavio, a to je zaštita prostora Općine Ilijaš da ne bude devastiran u smislu kako je to u Bioči urađeno. Dakle, u Bioči su kupili zemljište, isjekli šumu i sada će taj prostor ostaviti da se dešavaju klizišta koje će ugroziti čitavo naselje. Tu mi moramo imati u ugovoru ili odluci klauzulu koja će investitore usloviti da ne ostavljaju ovako nešto kao u Bioči.

Diskutanata po ovoj tački dnevnog reda više nije bilo, pa je predsjedavajući dao na

glasanje predmetnu tačku.

NEDIM MATORUGA – vijećnik SDA

Izrazio je sumnju u glasanje i zatražio pojedinačno glasanje.

ZA su glasali slijedeći vijećnici: Nedim Matoruga, Saudin Durmić, Halid Dizdarević, Muamera Masnopita, Fahir Hasanović, Rasim Šehić, Selma Pušina, Edhem Hasanović, Asim Mujić, Muhamed Handžić i Enes Dizdarević.

PROTIV su bili slijedeći vijećnici: Adem Efendić, Nijaz Mašić, Sead Šehić i Akif Bešlija.

UZDRŽANI su bili slijedeći vijećnici: Alan Šerak, Marioneta Ilić-Jureta, Damir Filipović, Selver Herić i Nijaz Rastoder.

Odsutni vijećnici: Mahir Dević, Muamer Dervišević, Besim Gljiva, Aida Mališević i Nihad Bučuk.

Konstatovano je da sa 11 glasova ZA, 4 PROTIV i 5 UZDRŽANIH, Odluke o utvrđivanju novog građevinskog zemljišta i plana parcelacije za izgradnju apartmanskog naselja Ivančići nije dobila potrebnu većinu.

Zatim je uslijedila pauza od 15 minuta (14:05-14:15h)

#### AD-7

Prijedlog Odluke o izmjeni Odluke o utvrđivanju novog građevinskog zemljišta i plana parcelacije za izgradnju apartmanskog naselja Ljubnići

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

U suštini, ovdje se mijenja površina i broj parcela iz razloga same strukture terena. U Ljubničima je nagib terena i došli smo do manjeg broja objekata, ali se povećala spratnost. Praktično, dobivamo skoro istu površinu koja je bila utvrđena prethodnom odlukom i saobraćajne površine su se povećale iz razloga što se kroz parcelaciju uzeo i pojas zaštitnog puta. Znači, umjesto 108 objekata, planira se 61 objekat.

Diskutanata po ovoj tački dnevnog reda više nije bilo, pa je OV-e glasalo sa 12 glasova ZA, 4 PROTIV i 5 UZDRŽANIH.

Konstatovano je da Odluka o izmjeni Odluke o utvrđivanju novog građevinskog zemljišta i plana parcelacije za izgradnju apartmanskog naselja Ljubnići nije dobila potrebnu većinu.

#### AD-8

Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br.75/27 – po novom premjeru k.č.br.396/32)

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o neposrednoj pogodbi za prodaju neizgrađenog građevinskog zemljišta

AD-9

Prijedlog Odluke o načinu i uslovima prodaje neizgrađenog građevinskog zemljišta  
(k.č.br.379/2)

HAMIDA MURATOVIĆ – šef odsjeka u Službi za imovinsko-pravne poslove, geodetske poslove i katastar

Pravni osnov za donošenje ove Odluke o prodaji predmetnog zemljišta je član 363. Zakona o stvarnim pravima koji se odnosi na prodaju građevinskog zemljišta putem javne licitacije. Služba za prostorno uređenje i stambeno-komunalne poslove dostavila je našoj službi urbanističko-tehničke uslove za izgradnju poslovnog slobodno-stojećeg objekta na lokalitetu Moševići. Radi se o izgradnji objekta-nadstrešnice površine 1020m<sup>2</sup>, a građevinska parcela 2 dunuma i 280 m<sup>2</sup>.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o načinu i uslovima prodaje neizgrađenog građevinskog zemljišta (k.č.br.379/2)

AD-10

Nacrt Odluka:

- a) o usvajanju Regulacionog plana "Ljubnići-Ilijaš"
- b) o provođenju Regulacionog plana "Ljubnići-Ilijaš"

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Na lokalitetu Ljubnići u površini 3,8 ha planirana je izgradnja privrednog kompleksa. Na tretiranom lokalitetu investitor želi izgradnju privrednih objekata u svrhu izgradnje objekta tov pilića – 100 000 kom u jednom turnusu. Snabdijevanje električnom energijom, vodom, izrada kanalizacione mreže regulisat će se izradom idejnih projekata kroz sam regulacioni plan. Napomenut ću samo de će biti promijenjeni termini za javni uvid i javnu raspravu. Znači javni uvid je u periodu od 12.03.2015. godine do 09.04.2015. godine, a javna rasprava će se održati 10. aprila 2015. godine u sali Općinskog vijeća Ilijaš u 14:00 h.

Diskutanata po ovoj tački dnevnog reda više nije bilo, pa je OV-e jednoglasno donijelo

ZAKLJUČAK

1. Utvrđuje se nacrt Regulacionog plana "Ljubnići-Ilijaš", nacrt Odluke o provođenju Regulacionog plana "Ljubnići-Ilijaš" i nacrt Odluke o usvajanju Regulacionog plana "Ljubnići-Ilijaš".
2. Nacrt Regulacionog plana "Ljubnići-Ilijaš", nacrt Odluke o provođenju Regulacionog plana "Ljubnići-Ilijaš" i nacrt Odluke o usvajanju Regulacionog plana "Ljubnići-Ilijaš" stavlja se na Javni uvid u periodu od dvadesetdevet (29) dana od 12.03.2015. do 09.04.2015. godine, a Javna rasprava na nacrt Regulacionog plana "Ljubnići-Ilijaš", Nacrt Odluke o provođenju Regulacionog plana "Ljubnići-Ilijaš" i nacrt Odluke o usvajanju Regulacionog plana "Ljubnići-Ilijaš" održat će se 10. aprila (Petak) 2015 godine u Sali općinskog vijeća Ilijaš (podrum zgrade Općine Ilijaš) sa početkom u

14 sati.

3. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš dostavljaju se Općini Ilijaš, Službi za prostorno uređenje i stambeno komunalne poslove, koja organizuje i sprovodi javnu raspravu.
4. Služba za prostorno uređenje i stambeno komunalne poslove dužna je nakon sprovedene javne rasprave da podnese izvještaj, Općinskom vijeću Ilijaš, o rezultatima Javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni.

#### AD-11

Prijedlog rješenja o:

- a) razrješenju člana Komisije za statut i propise
- b) izboru člana Komisije za statut i propise

Diskutanata po ovoj tački dnevnog reda nije bilo, pa je OV-e jednoglasno donijelo

Rješenje o razrješenju člana Komisije za statut i propise

i sa 20 glasova ZA i 1 UZDRŽANIM donijelo je

Rješenje o izboru člana Komisije za statut i propise

#### AD-12

Prijedlog rješenja iz imovinsko-pravne oblasti:

- a) rješenje broj:06/1-31-155/15
- b) rješenje broj:06/1-31-161/15
- c) rješenje broj:06/1-31-162/15
- d) rješenje broj:06/1-31-314/15
- e) rješenje broj:06/1-31-386/15

HAMIDA MURATOVIĆ – šef odsjeka u Službi za imovinsko-pravne poslove, geodetske poslove i katastar

- a) rješenje broj:06/1-31-155/15 – utvrđivanje javnog interesa radi izgradnje javne rasvjete u naselju Vladajevići
- b) rješenje broj:06/1-31-161/15 – utvrđivanje javnog interesa vodovod Popovići – apartmansko naselje
- c) rješenje broj:06/1-31-162/15 – nepotpuna eksproprijacija za kanalizacionu mrežu za apartmansko naselje Popovići
- d) rješenje broj:06/1-31-314/15 – nepotpuna eksproprijacija za kanalizacionu mrežu i odvodnju fekalnih voda u sklopu Industrijske zone Luka
- e) rješenje broj:06/1-31-386/15 – nepotpuna eksproprijacija, a odnosi se na rekonstrukciju priključka na regionalnom putu ul.Žrtava genocida Srebrenice (lokalitet Gnionica-Podlugovi).

Diskutanata po ovoj tački dnevnog reda više nije bilo, pa je OV-e

- a) rješenje broj:06/1-31-155/15 – jednoglasno donijelo

- b) rješenje broj:06/1-31-161/15 – donijelo sa 20 glasova ZA i 1 UZDRŽANIM
- c) rješenje broj:06/1-31-162/15 – jednoglasno donijelo
- d) rješenje broj:06/1-31-314/15 – jednoglasno donijelo
- e) rješenje broj:06/1-31-386/15 – jednoglasno donijelo

#### AD-13

Informacija o stanju kriminaliteta, javnog reda i mira i saobraćaja na području Općine Ilijaš za 2014. godinu

JUSUF ZORNIĆ – načelnik V Policijske uprave

Želim reći da ne robujem statistici i ovi pokazatelji u informaciju su izuzetno dobri. Naravno, uvijek se kaže da može i bolje. Naš cilj je da je kriminalitet u silaznoj putanji i da je otkrivenost dobra. Vidjeli ste da smo u odnosu na 2013. godinu imali 79 krivičnih djela manje. Jedina stavka gdje ima povećanja jeste nasilje u porodici i ove godine ćemo preventivno djelovati na ovom planu u saradnji sa Centrom za socijalni rad. Ono što je takođe vidljivo, to je da smo u 2014. godini imali 242 prekršaja, ali u 77 slučajeva su podnešene prekršajne prijave, odnosno izdati prekršajni nalozi za 112 lica. I tu je vidljivo smanjenje.

U sigurnosti saobraćaja imamo smanjenje broja saobraćajnih nezgoda što je jako bitno. Ono što mene zanima i što je po meni bitno, jeste rad policija sa zajednicom. Mi smo tu radi građana i mislim da i pored toga što se puno posvećuje pažnja, imamo dosta predavanja i edukacije po školama sa djecom, ali ipak nismo dostigli taj nivo koji je potreban da nam policija što više bude u naselju. To je možda i razumljivo što PS Ilijaš i nema dovoljno policajaca koliko bi ih trebalo imati. Međutim, i veći broj policajaca neće moći puno postići ako nema saradnje sa zajednicom.

Ja od komandira i svojih saradnika tražim da se policija što više približi građanima.

Ono što je bitno, a prošle godine je bilo izraženo, bila je krađa električnih kablova u Bioči. Tu smo imali problema, a evo već duži vremenski period nemamo, jer se i tu kroz planske aktivnosti poduzelo dosta toga. Tretiralo se dosta lica, ali nismo konkretno ništa mogli dokumentovati, ali i to je imalo dosta uticaja i mislim da i tu građani moraju pomoći.

Situacija je trenutno dobra i truditi ćemo se da bude još bolja. Nemamo nekih ekstremnih slučajeva izvršenja krivičnih djela.

ENES DIZDAREVIĆ – samostalni vijećnik

Raduje me da je broj krivičnih djela manji za 79 djela u odnosu na prošlu godinu. Malo me zabrinjava statistika, a vi kažete da podaci nisu pokazatelji, ali podaci su ti koji pokazuju pa pitam šta je razlog da je došlo do manjeg razrješavanja slučajeva u 2014. godinu u odnosu na 2013. godinu.

NIJAZ RASTODER – vijećnik LDS-a

Drago mi je da je došlo do smanjenja krivičnih djela. Volio bih da više sarađujete sa školama i da jednom u tri mjeseca, vaš čovjek, koji nije u uniformi, dođe u škole i ukaže djeci 8-9-tih razreda šta su to krivična djela na jedan civiliziran način.

NEDIM MATORUGA – vijećnik SDA

U posljednje vrijeme se nije posebno tretiralo stavljanje u promet opojnih droga. Da li

imate saznanja, pošto mi imamo određena saznanja da se u Ilijašu u zadnje 2-3 godine dešavaju određene aktivnosti po ovom pitanju i da o tome treba povesti računa. Po mojoj ocjeni sigurnosna situacija u Ilijašu je zadovoljavajuća. Ono što mi stvara nelagodu jeste da se nije uspjelo riješiti ovo krivično djelo krađe kablova u Bioči. Dalje, šumske krađe – statistika je statistika, ali mi je neshvatljivo da imamo samo dvije prijavljene šumske krađe u 2014. godini. Ovo nije primjedba vama, nego svima nama za razmišljanje. Interesuje me da li se planiraju neke akcije vezano za stavljanje u promet opojnih droga?

MUHAMED HANDŽIĆ – vijećnik BPS-Sefer Halilović

Raduje ova informacija od načelnika da je smanjen broj krivičnih djela i da je prestala krađa kablova na području Bioče. Možda su, prestanku krađa, najveći doprinos dali građani i bivši načelnik i njegovi saradnici koji su dolazili u Bioču i održali sastanke sa građanima i na taj nači se približili građanima. Krađa kablova u Bioči nikada nije rasvijetljena, pa možda je ovo odgovor Dizdareviću odakle toliki broj nerazriješenih slučajeva, jer je tih krađa bilo mjesečno i do 3-4 puta.

Građani će surađivati ukoliko imaju sigurnosnu garanciju, ali mislim da te sigurnosne garancije nema. Navest ću jedan primjer kada sam prije tri mjeseca sam zvao dežurnog policajca da prijavim da teški valjak ide putem za Bioču i lomi put. Za par minuta sam imao veliki broj poziva da taj valjak ne diram. Ne mogu da vjerujem da su neki ljudi prije došli do informacija nego što je obavještena patrola.

SELVER HERIĆ – vijećnik SDP-a

Drago mi je da pokazatelji pokazuju da su izvršenja otkrivanja tih počinilaca na nivou. Segment kao šuma, neshtavljivo mi je da je zabranjena uplata ogrjeva, da se svi grijemo na drva, a da je samo dvoje uhvaćeno. Pozivam policijsku upravu radi obilaska terena i razrješavanja kojekakvih krađa i da uputite dopis zabrane prokopavanja puteva kroz šume, jer šumari čuvaju šume, a ne kanali.

Nekada davno sam postavljao pitanje, a nikada nisam dobio odgovor, vezano za krivinu na izlazu iz Čevljanovića za Srednje gdje se dešavaju saobraćajne nezgode. Stoga pozivam vas direktno da nešto poradite na tom. Ne znam da li se radi o pogrešnom nagibu krivine ili masnom putu.

SAUDIN DURMIĆ – vijećnik SDA

Vezano za šumske krađe, ne želeći abolirati ni policiju niti šumsku upravu, predlažem da napravite koordinirani sastanak u poduzimanju preventivnih mjera za sprječavanja tih pojedinaca koji krađu šumu. Znači u saradnji upravom za šume trebate napraviti koordiniranu akciju i od onog momenta kada motorno vozilo izađe sa šumskog puta na javni put mislim da imate zakonske okvire da takve pojedince sankcionišete.

Drugo, svim građanima u Ilijašu je poznato da se na pojedinim lokacijama u Ilijašu: bivša direkcija Željezare, gradski nogometni stadion, park Alića Gaj, željeznička stanica Stari Ilijaš okupljaju pojedine grupe koje su podložne konzumiranju opojnih droga, narkotika itd. U tom pravcu sugerišem da poduzmete preventivne mjere tipa patrolnog obilaska i evidentiranja tih lica. Odluka o zabrani okupljanja maloljetnih lica na javnim mjestima poslije 23h je na snazi, pa bi bilo dobro da se djeluje preventivno.

AKIF BEŠLIJA – vijećnik SBB-a

Broj kontrolisanih motornih vozila i broj kontrolisanih lica u motornim vozilima je opao u 2014. godini. Ne znam razlog zbog čega je to tako.

HALID DIZDAREVIĆ – vijećnik SDA

Imam jednu molbu za načelnika V PU, a to je da se pojača preventivno djelovanje i zabrana kladenja maloljetnih osoba na području Općine Ilijaš, jer poznato je da u Ilijašu (od raskršća Podlugova do Starog Ilijaša) ima preko 17 kladionica. Ukoliko neko od policijskih službenika nađe nekog maloljetnika da se kladi da se uvedu rigoroznije kazne prema odgovornim licima, jer znamo da je zabranjeno kladenje maloljetnih osoba.

MAHIR DEVIĆ – zamjenik predsjedavajućeg

Zamolio bih sebe i ostale kolege i sugerisem svima da neke teme koje sami sebi postavljamo na dnevni red, a koje nemaju blage veze sa realnošću i sigurnošću na području Općine Ilijaš i sa investicionim ciklusima na području Općine Ilijaš, da to ne radimo. Neke televizijske kuće nam ne trebaju i zbog nekih članaka i objava koje mi sami sebi pravimo vrlo lako bi sebi mogli staviti neku fakturu koja nema ama baš nikakve veze sa Općinom Ilijaš. Ono što ja znam, u ovoj općini se uvijek vodilo računa o svima i drugim i drugačijim i ovo što sada pojedinci rade nije dobro i treba odustati od takve političke retorike koja bi se mogla dočekati na dnevni red vrlo jednostavno. Ako nemamo pametnijeg posla u Ilijašu kao politika, političari, vijećnici i kao građani da Ilijaš promoviramo na pametniji način od ovoga koji sada radimo, onda da nastavimo tako. Nemojte da svaki put Ilijašu stavljamo stvari koje nemaju veze sa realnošću.

Najmanje je važno da li je neka tačka prošla na dnevnom redu ili nije, ali da mi postavljamo pitanje sigurnosti na području Općine Ilijaš i da pričamo o investicijama da sami sebi stavljamo nešto na "rep" što nema blage veze sa životom ovdje, ne trebamo mi to politički raditi i to je moj apel s aspekta sigurnosti. Meni nije jednostavno kada RTRS dolazi ovdje i traži izjave koji mi pravimo. Naravno, to je televizijska kuća kao i svaka druga, ali ne volim da se stavlja faktura na "rep" našoj općina, pogotovo kada to politika i mi sami sebi pravimo. Nismo ni svjesni kakve posljedice mogu proizaći.

JUSUF ZORNIĆ – načelnik V Policijske uprave

Policija nije jedini segment koji mora da vodi računa o sigurnosti. Prije policije ima puno segmenata koji moraju da se uključe u problematiku koja se zove sigurnost.

Rasvjetljenost krivičnih djela – nemojte da budemo u zabludi kada je u pitanju rasvjetljenost krivičnih djela. Prava rasvjetljenost krivičnih djela svugdje se može mjeriti sa zvaničnim presudama koje dođu od suda.

Procenat 56,99 je ekstra i meni je, kao načelniku, kao profesionalcu koji sam iz ove branše, puno draže što se to smanjilo za 79 krivičnih djela koje možemo mjeriti, a otkrivenost je vrlo upitna u svim segmentima.

Saradnja sa školama da se poveća – mi maksimalno obilazimo škole, a to da se djeci 8-9-tih razreda priča šta je krivično djelo ili šta nije, ali to njih baš i ne interesuje. Mi njima predajemo stvari vezano za zloupotrebu narkotičkih sredstava i da se ne dohvate toga i nama je to puno bitnije. Mi imamo projekat RPZ (rad policije sa zajednicom) i imamo posebnog policajca koji obilazi sve škole. Imamo izuzetno dobru saradnju sa svim školama i nastavnim osobljem.

Vezano za opojne droge – imamo poseban odjel za borbu protiv narkomanije koji radi fantastično i koji brine i za ovo područje. Ja vama ne mogu sada objašnjavati neke operativne stvari.

Šumske krađe – to što je prikazano dva krivična djela, puno više toga policija uradi na terenu i to preda šumarima, onima koji su nadležni za to.

Krađa kablova – dosta ljudi je vođeno na poligraf, ali vi ne možete zamisliti koliko je teško dokazati neke stvari. Puno znači što se preventivno djelovalo.

Kada dođemo u segment da budemo svi policajci, onda sigurno nećemo o ovim stvarima raspravljati.

Vezano za prijavu prolaska mašine – "u svakom žitu ima kukolja". Ja ne mogu reći da šef smjene nije nekome rekao evo neko zove i pita šta ću, taj zove nekog drugog itd.

Problematika krivine – tih krivina i kontra nagiba ima puno. Svako se mora pozabaviti onim što mu je u nadležnosti.

Okupljanja omladine na određenim javnim mjestima – mi ćemo napraviti bumerang, jer ako nećete dijete otjeramo, može se desiti da roditelj dođe i kaže zašto mu maltretiramo dijete, ali naravno da ćemo i ovo poduzimati.

Kontrola motornih vozila – i ja sam pobornik toga, ali nisam pobornik za stihijsku kontrolu.

Primjetili ste da je više kontrolisano lica u vozilima i to je po meni bolje.

Pitanje kladjenja maloljetnika – imamo situacije da roditelj pošalje dijete da mu uplati kladionicu, ali i to ćemo rješavati.

Bit će mi drago da se policija PS Ilijaš približi što više narodu, jer samo tako zajedno možemo nešto uraditi.

Diskutanata po ovoj tački dnevnog reda više nije bilo, pa je OV-e primilo k znanju

Informaciju o stanju kriminaliteta, javnog reda i mira i saobraćaja na području Općine Ilijaš za 2014. godinu

AD-14

Informacija o radu Službe socijalne zaštite Općine Ilijaš za 2014. godinu

HUSEIN HAFIZOVIĆ – Šef Službe socijalne zaštite Općine Ilijaš za 2014. godinu

Da bi došlo do znatnijeg poboljšanja u kvalitetu i kvantitetu u segmentu socijalne i porodične zaštite uopće, pa i na području ove općine neophodno je prevashodno više raditi na programima zapošljavanja i razvoja poljoprivrede, te više ulagati u programe prevencije u ovim oblastima. Na ovaj način smanjio bi se broj lica, odnosno porodica u stanju socijalne potrebe i stvarala bi se veća materijalna podloga koja bi uz dodatnu materijalnu potporu resornih kantonalnih i federalnih ministarstava i lokalne zajednice i uz bolja i sretnija zakonska rješenja koja bi bila usklađena sa međunarodnih standardima i konvencijama i uz definisanje linije siromaštva omogućilo da pristojnu pomoć i potporu dobivaju stvarno ugrožene kategorije stanovništva.

Rad u Centru, odnosno Službama donekle usložnjava primjena Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodica sa djecom FBiH koji je stupanjem na snagu nametnuo ogromne obaveze svim centrima, odnosno službama, pa i ovoj Službi, a od početka primjene Zakona pd 2006. godine pa do danas podneseno je 4916 zahtjeva, te je doneseno 2664 rješenja.

Napominjem da su navedenim Zakonom, kao i izmjenama već postojećih i novodonesenim podzakonskim aktima, a iz kojih proizilaze poslovi Službi, Službama u rad stavljeni čisto administrativni, a potisnuti stručni poslovi što je u navedenom periodu imalo

odraze na kvalitet rada u osnovnoj djelatnosti ove Službe.

Diskutanata po ovoj tački dnevnog reda više nije bilo, pa je OV-e primilo k znanju

Informaciju o radu Službe socijalne zaštite Općine Ilijaš za 2014. godinu

Zatim je zamjenik predsjedavajućeg, Mahir Dević zaključio 28.sjednicu OV-a u 15:40h.

Zapisničar:  
Maida Habibović

PREDSJEDAVAJUĆI  
OPĆINSKOG VIJEĆA ILIJAŠ  
Damir Filipović, dipl.pravnik

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
Broj certifikata:20938

